

豫

章

焚

書

第三七册

廬陵郡自歐陽文忠公以文章積韓文公正傳遞爲  
本朝儒宗繼之者龍雲劉公也公諱弁字偉明居安  
福縣之龍雲鄉文忠薨於穎公方冠不及從之游然  
斯文未喪何害爲韓門籍湜也先是汴京及麻沙刻  
公集二十五卷紹興初子故人會昌尉羅良弼徧求  
別本手自編纂增至三十二卷凡六百三十餘篇惟  
公昔旣不壽今復□□其姪孫上高尉希高抱遺編  
而永歎嘉泰三年賢守豫章胡元衡平一表鄭公之  
鄉里訪襄陽之耆舊欲廣其書激厲後學子亟屬羅  
尉之子泌繕寫定本授侯刻之頃嘗與鄉人論公之

文如南郊賦氣格近先漢已爲泰陵簡擢詩書序記  
往往祖述韓柳間或似之銘誌豐腴規摹文忠讀者  
可以自得至於才學出處具載李彥弼誌銘羅氏跋  
語皆月旦評之不可易者也□□四年六月少傅觀  
文殿大學士致仕益國公周必大序

宋有天下四百餘年廬陵郡以古文倡明斯道自歐陽文忠公始繼之者龍雲劉先生也先生諱弇字偉明龍雲其號也登元豐進士第繼中博學宏詞科元符中有事于南郊嘗進南郊大禮賦哲宗覽之動容以爲相如子雲復出子每以不獲見先生之文爲恨今年春吾聞大參安成劉公孟旬宣來延平語子曰吾祖龍雲先生著述甚富歷世旣遠流落天地間漫不可省天順間先君始得龍雲集於彭文憲公出自秘閣窮晝夜手鈔弗懈乃有是書吾雖王事于外亦必載以偕行出以示予予受而讀之以償其夙願先

生之學博極天下之書見諸文章一以羽翼聖道爲  
先務才雄氣駕縱橫開闔千姿萬態生生不窮其南  
郊賦麗鬱雄邃如殷卣周彝龍紋漫滅古意獨存又  
如泰山之雲層鋪疊湧沓莫知其端倪詩書序記誌  
銘數腴渾涵如澄湖不波一碧萬頃魚龍潛伏而不  
動淵然之色自不可犯宏詞時議策問瓌奇峻逸如  
江海駛而蛟龍擊風霆薄而元氣溢森乎其芒寒皜  
乎其輝燁嶷然獨任斯文之重而使有宋之文章與  
古之作者侔盛乃先生之功也或曰周益公必大謂  
廬陵郡自歐陽文忠公以文章積韓文公正傳遞爲

一代儒宗繼之者龍雲先生也信歟予曰文之難言久矣周秦以前固無庸議下此惟西漢爲近古晉宋齊梁趨於綺靡弗振至唐韓文公始斥而返之韓氏之文非唐之文也西漢之文也逮宋歐陽文忠公始振而效之歐陽氏之文非宋之文也西漢之文也先生之文醞經飫史吞吐百氏直欲追配于韓于歐亦非宋之文也乃西漢之文也哲宗以爲相如于雲復出可謂知乎文者矣周益公之論豈欺我哉先生真古之人彙一代之儒宗也歟大參將鈇梓以傳屬予爲之序予惟韓氏之文李漢序之歐陽氏之文蘇軾

序之先生之文周公已嘗序之矣予何人敢於焉  
置喙雖然大參之父秋官郎中公秩予之同年碩德  
雄材所著有思誠齋詩集大參先任都給事中正色  
立朝議論剴切其奏疏必收諸青史皆足與龍雲文  
集並垂不朽何一門之多賢也不亦盛哉而廬陵郡  
之文獻於此足徵矣是可書也予故爲之序

弘治乙丑夏四月之吉賜進士資政大夫太子少保  
工部尙書侍經筵官致仕七十七翁廷平劉璋書

龍雲集目錄

卷一 賦

進元符南郊大禮賦表

元符南郊大禮賦

德至者色澤洽賦

仁人之言其利溥賦

卷二 宏詞

太史箴 并序

代宰相已下謝賜新修都城記表

紹聖元會頌 并序

誠諭士大夫敦尚名節

卷三 詩

古詩二十七首



卷四 詩

古詩三十八首

卷五 詩

古詩四十九首

卷六 詩

古詩三十一首

卷七 詩

律詩七十一首

卷八 詩

律詩八十五首

卷九 詩

五言絕句十首

七言絕句九十七首

卷十 詩

生辰詩十二首

挽詩十三首

樂府六首

卷十一 表

代陳度支楚州謝上表二首

代賀平鬼章表二首

代江西轉運副使謝上表二首

代謝賜元祐編敕表二首

代謝賜元祐編敕表二首

賀赦表二首

代洪帥熊伯通待制

代賀三后受册表三首

代謝移湖南表二首

京本作湖南上任表

卷十二 敢

謝解啟

謝解魁啟

謝及第啟

謝中宏詞啟

謝改京官啟

謝運使度支舉京官啟

謝王運判補發陳運使不該收使京官狀啟

京本題王作田

謝田運判舉京官啟

謝運判吳朝散發改官狀

卷十三 啟

代賀僕射呂晦叔啟

京本作狀無代字

代劉漕賀文潞公啟

寬夫

代熊帥伯通謝司馬溫公啟

代賀李公擇遷戶部尙書啟

代回賀蘇舍人啟

子由

代謝政府啟

賀呂司空啟

賀范右揆啟

賀范右丞啟

賀右丞啟

賀黃右丞 安中 啟

代運判賀左丞啟

代賀除僕射啟

賀孫中丞啟 京本作狀

賀彭狀元除舍人啟

賀中書侍郎啟

賀中書侍郎啟

賀中書舍人彭公啟

賀李左丞出鎮河陽啟

代賀謝梅孔二學士啟

代上江西湖南按察院啟

卷十四 啟

謝發運張龍圖舉太學博士啟

謝運判王司封舉太學博士啟

代李令謝舉升擢啟

代回廣州蔣待制啟

回廣州蔣待制啟

代賀發運朝請啟

代起居李公擇啟

代與文龍圖啟

賀范發運啟

問候穎昌府曾資政啟

回李兌先輩啟

回程安行先輩啟

回李介經明行修啟

代回張建昌啟

回知府黃待制啟

問候趙給事啟

賀新提點朝散啟

謝鼎州知郡朝散啟

代賀傅漕啟

轉提刑

代劉漕回興國軍朱朝散啟

回知軍內翰啟

賀正狀

與吉州吳守

賀冬狀

謝升擢啟

代賀提刑轉官啟

代回謝知府熊待制啟

代回知郡賀上啟

代回謝知郡啟

回通判啟

卷十五 書

上曾子固先生書

上曾子宣樞密書

上許左丞書

冲元

上葉舍人致遠書

上陸農師書

上張天覺學士書

卷十六 書

上呂觀文吉甫書

上中書侍郎李邦直書

上章僕射子厚書

上程司業子久書

上蹇司諫書

上陳按察次升書

上周提刑書

卷十七 書

上蔡內翰元長書

再上元長內翰書

上蔡元度右丞書

再上蔡元度書

見蔡元度書

時爲給事

上運使蔡學士書

再上蔡學士書

卷十八 書



上熊侍郎書

上黃冕仲博士書

上朱舍人行中書

一作饒太博

上運判王司封書

上李提點書

上提刑鄒度支書

上許通判書

卷十九 書

代上提刑宋大夫書

代上郭招討書

代上知府王觀文書

代上鍾離朝儀書

上運判彭察院書

上運判林積書

卷二十 書

上轉運黃司業書

上趙龍圖書

上范教授書

上張教授書

求知己書

卷二十一 書

上知府曾內翰書

子固

上劉子先學士求銘文書

上杜知郡書

投梅詩

上陳運使書

子先

再上陳運使書

上范運判書

卷二十二 記

吉州新修小廳記

吉陽持正堂記

愚堂記

蟠齋記

禾山龍溪亭記

卷二十三 記

吉州新修天慶觀三清殿記

重修共樂亭記

足齋記

澄碧軒記

獨遊狼山記

卷二十四 序

講春秋序

講論語序

葉謙甫唱和詩序

悅禪師語錄序

諸公紀贈四謝詩序

章文柔詩序

卷二十五 序

送盛大夫 仲孫 歸朝序 并詩

送杜然中序 并詩 送田曹三許序

送高與可還儀真序 送葉令謙甫序

送閑禪師還鍾陵序 送道士習順偕序

卷二十六 時議

舉逸民 井田肉刑

守令 武功爵

復園土 禮部取士

卷二十七 策問

傳注 時令

賦

代田

聲詩歌頌

銓品

措刑

拾遺補闕

史

老莊

知人

儀禮

食以養士

貨殖

西漢文章

名節

諡

將

卷二十八 策問

漢唐

三傳同異得失

養老

正統霸統

功名器識

王通

九流

沐

錢

司市十有二禁

宗子

學者灑掃應對

役法

名

朋黨

用材惟其長

兵制

茶

州縣之權

禁謁謁禁

卷二十九 策問 雜著

召試著作正字校書

復賢良方正科

紹述

春秋

謁禁

疾醫

佛

海門按田書陸瓊橋壁

書隱居玉適中壁

書漢武帝故事後

刻劉宜翁五詩碑跋

書楚辭後

卷三十六 疏文 祝文 祭文

興龍節開啟功德疏文

代洪帥熊伯通待制二道

又代在州官一道

又代西衙侍禁一道

坤成節開啟功德疏文

代熊待制 二道

又代劉運判 一道

又代在州官 一道

坤成節啟建功德疏文

待洪帥 一道

又代眾官 一道

謁文宣王文

謁堯國公文

祭順濟龍王文

祭海神文

祭王荆公文 代人 二首

祭鄒通直文

祭王夫人文 三首

卷三十一 墓誌銘 墓表

宋高士何君墓誌銘

宋居士王君墓誌銘

劉伯景墓誌銘

宋鄧夫人墓誌銘



宋歐陽文叟墓誌銘

蕭孝廉墓表

卷三十二 墓誌銘 碑

宋故王君章墓誌銘

王公權墓誌銘

冲厚居士劉君墓誌銘

壽安縣君張氏墓誌銘

宋故劉先生墓誌銘

觀禪師碑

附錄

劉定周夫人墓誌銘

李彥弼劉偉明先生墓誌銘

宋史列傳文苑六

宋史列傳忠義九

目錄終

龍雲先生文集卷一

安成劉弇偉明

古律賦

進元符南郊大禮賦表

臣弇言臣疵賤坎壈生亡益縣官紹聖中有司第臣  
宏辭程文入等奏御蒙陛下誤恩擢大學博士厥績  
弗底祿尸食浮今者歲一再見矣平居訓講之暇不  
敢自齒於錄錄則間曠意翰墨因得窺知古人所以  
班班槩見而不可厚誣如三都二京客卿烏有之比  
者竊嘗謂詞人文士之作雖取經不純去道時遠至

於變化飛動神開筆端得不因人自我作古新一代

耳目起太平

一作帝王

極功有如此曹殆不多得屈宋已

還賈生相如向褒雄固最號高手能使往漢光華至  
今數子力也自時厥後苟作之徒弊毫殫楮或文不  
足以起意或趣不足

一作得

以會真而其時君至有持

一時赫赫盛烈甘心低回委之斯人之手磨滅就盡  
豈不痛哉恭惟皇帝陛下光明緝熙纂業七世自親  
政以來事條物理包乾括坤緝儀豐藻符貺休顯雖  
古號丕平極隆無以加此矣乃者冬至有事於南郊  
其日甲子最道家所貴協吉登良曠古難值况復肇

營齋宮

一作居

燕神億明行事之始曠無纖雲風恬星

輝萬里一色竣事復輒登門肆眚天人統和臣弇時則猥預祠事耳更目悉竊自慶快以爲出於昔人以此有事爲榮欲焉而弗獲者遠甚夫易難遭忽希闕闕熙事而不榮鬱主美而弗宣亦懷薄技而不效者罪也 弇不避僭易頗復宋掇西漢氣質課成元符南

郊大禮賦一通使萬世之下知有吾宋如白日之麗慶霄茲臣志也夫餘力逸勁飲於石梁上方宋人之弓則不足然臣之精力自以爲盡於此矣謹昧死繕寫隨表上進伏望陛下清閒之隙少紆睿覽則臣

雖沒齒榮莫大焉臣無任云云

元符南郊大禮賦

粵若溟滓鴻濛之始登魚奠獸肇豺獮之知圓顛方  
趾厥協精純肅專於是乎有祭及稽諸載籍則郊之  
禮尙已傳曰帝王莫大乎承天記曰惟聖人爲能饗  
帝以其祖配則七代之所更立如指諸掌者蓋明乎  
郊社之義虞夏商周胚胎前芳繇冥譽黃用詔於後  
王京本無厥惟舊哉及陋者爲之則誣天贊祖神醜  
雜擾其語弗經見措紳者不道九天太一三一八神  
則方士之說試黃蛇白帝陳寶鳴雞京本作則秦餘

之祀舉或龍馬寓木或待我而五或遙拜竹宮或俛  
子旁午故漢三十年間天地之祠五徙而稚圭之徒  
罷去四百七十餘所有唐末造闕漏莽鹵殆不足數  
是則數千百載寂寥無詔之闕典誠有待乎我宋七  
世彌文之真主矣昔者五季不綱嘯屯拏否童阜魁  
陵蕩去典制遇民則雍氏刈草置園則累棊十二雪  
桃薦屢顛倒本末飲羊璞鼠屢廢竄真盛鶴列者羞  
綿蕞笑章甫者高惠文翼飛虎使一作與婪食冠沐猴  
使搢紳慄慄遭黎沸糜擾雲柴薪燔之弗嗣丘故園  
而益泯凡時君惡其害己也十去八九而先王所以

揭虔妥靈者其間僅存序

一作

雖有天成長興之字圖

固已恇悞越越翦翦焉獨奚補吾世之討論哉

京本無世

字

我藝祖之初也皇武奮張拱揖宅師奠九厘而業

萬世支傾柱而紉

京本作紐

絕維道籠德絡藥瘵疔疲於

斯時也而未熙大宗熙文僕我景命汾晉江吳以

次條頸去鼠箠之苛後茹黃之諍於斯時也熙而未

定大定維真底綬諡甯貯祥儲休汾睢

當作

云亭於

斯時也定而未成然猶一祖二宗或五或三嚴配昭

升往遵於南曰仁曰英承憲履繩乾酬坤答穀不及

停爰迫神考基命宥密釐正丕誕無文威秩剡倮陋

與蓮脆獨飛蕤而遺質上咸五而下登三墳作四而  
籍言七更載十九上儀越軼則有元豐之祀典存焉  
及陛下繼之也履紹聖躋元符贊夏子覲唐虞童劉  
李斯魏吳掃攢蠹如彈座開夷軌乎破觚皐後夔前  
履錯珮摩洗涓巢其來游來歌懟往者易頑顏而鑿  
方心踞新者厭京本作飲淡泊而醒醅和寧同穎之秀而  
穀人腹沐塗旁之枝而桑者衣霜顛卒齒而不兵黃  
吻嘯儻而課嬉喪衣短後羽禱祗祓陶冶於旣醉風  
胎雨驚灌莽苞皂長懋京本作楸乎由儀雞犬之聲相聞  
烏鵲之巢可窺若乃史不絕書則甘醴歲滃華滋宵



零奔精標南而照老榮波醜曲以薦清緇文黃輝素

鳥

京本  
作鳥

朱英四肩九尾不可殫名象來致福則鬢首

鑷耳之俗頭飛鼻飲之鄉濮鉉僻卧之酋長戴斗蠟  
蠟之名王解辯削衽踵係乎職方然猶雍上久虛傳  
囷壽昌之玉刻譙赫申旦下貫不拚之景光仙驥儷  
翼於武夷駢竹笨尊於豫章是謂應期紹至不特創  
見豈徒諸福之物可致之祥也邪聖上則攬龐禱初  
矍然誣挹損採搗謙休哉孰爲此者我則歸賴於天  
於是條頌祇之書下發中之詔天姥之日練掌故之  
儀草卽是歲之冬至將有事乎南郊之兆禮也先是

齋宮僅存翼以縵城有司弗度拄頰支傾天啟人基  
厥營端誠觀夫端誠之成也司空庀徒太史揆星審  
曲面勢匠人是經爾乃計工僱課匠石順陰陽衆材  
度霰屑雨柿壘山噎壑協庶民之子來謹百堵之皆  
作於是桴木姑繇之墟薦芻苑蓬之巔負瑤光而捫  
太乙走神皋而瞰綺阡飛驥軒軒而鵲起修梁亘空  
而虹蜿左平右城青瑣綺疏的皪連蜷承阿結隅叢  
芝栢與繡塗燿賦白而駢朱銜環躍楯千詭萬殊豈  
惟仙靈雲氣情練而霍靡厥有飛廉翁仲矇眊而睚  
盱其前則崛起泰禋瞰臨朱垠象嶢闕之中天疑徙

居於化人其後則崇墉屹屹配以拱極嘉德中豁揭  
之金勒承和迎禧左右迭披告虔則寅明東峙表事  
則肅成西直銅題鈿砌微道外周扶拱棲榼陽烏陰  
虬狀崑峩而蕙業吁欲擲其中留然而高廂嚴除窳  
寮靚深舒紫蔭之奕奕助清思而愔愔卷皇明於寂  
照攝睿念於幽襟於此而疏淪澡雪則見其所爲齋  
者於此而觀天地萬物之復則履新陽於故陰於此  
而朝羣臣則壯萬乘而取威重於此而申懿鑠則有  
嘉德而無違心是謂一舉而四善得豈比夫雲陽甘  
泉窮物怪而誇麗淫者哉然後前期七日受誓戒飾

戎容命掌女使設邸詔封人使墮宮請中殿而奏外  
辦毋不恪以彙臣工款原廟而朝祐室龜食墨而吾  
從是日也改天步仗黃麾服大裘翳華芝巾玉輅馴  
秀騏撰清旂旅飲飛平盤廓以夔略兮纓帶颯而蕨  
蕤絢綢杠之子子兮右闕戟左青旂百神警而陪衛  
兮千官儼以襜褕於是雲罕啟行憶弩射私褻稍星  
羅柯舒鱗差烏號夏服星鏞月弦跳盪虓闕震震聞  
闕塵不漸軻委如注川初逗隘而取寬俄舉中而包  
偏清蹕曳聲而肅譁班劍竦飾以陸離鼻獸獻馴而  
雅拜天驥睨雲而鳴羈黃道端以綱直兮下朱雀遙

南薰物色別之五衣兮禽焉綺錯霍焉霞分貫裂闕  
以靡旃兮哄閶闔而噫輪詰蚩尤使當兵兮戒兩師  
使清道全波涌而燎揚兮默寔吞而鯨窟炭箴丘而  
跳巒兮悅神騰而鬼趨

子笑切出  
河東賦

辰十二以效時兮

車抗指而司方蓬勃鬱翥蹂以戢香兮半岸叱綽沛  
以相羊騰蛇白澤詰呵神姦兮桃弧棘矢攘却不祥  
決旬始而掃攙槍兮飛蒙茸而走陸梁爾乃賁諸之  
傳拘怒立發跋扈睚眦陰伺微察鑿朱涅墨裂背直  
髮當之者糜碎過之者氣奪曾徒手之不抗况臂弧  
而腰鐵於是乘輿之至端誠也適晡焉然後金吾誰

何寧壺管昏雞人叫巾車而呼旦大宰既滌濯之前

陳物告備攢題揭寘蒼璧豆

京本  
作玉

登設器陶匏席蓐

酥牲孔時酒醴潔時也天形東磬萬籟寂絕玉繩低

隅而黏波霜華飛清而漲

一作  
張

闕蒼虬蟠闔而不動

燭龍噴垠而布蕤班馬蕭蕭七萃卷舌絳紗萬枝扶

鑣夾轍烘鱗髓與鳳膏邀珠還而電掣天子乃步自

大次暨小次而須焉左延右揖樞臣禮官以引以翼

遂造乎

京本  
作平

壇端柴

京本  
有望字

煙升帝謚寫靈斯旂下

風馬藝祖是配禮無遺

當作  
違

者百神受職魚魚雅雅

將事之臣罔敢不共肅骨嚴顏秋秋

京本  
秩秩

頤頤弁

匪首以星俯球飾趨而鸞噪若乃

京本  
作萬堵

以備樂磬

簫笙鏞孤竹之管其宮園鍾狎獵後先翠葆崇牙宣

和播粹金支秀華般裔裔以依承貴人聲而登歌以

亞以終飲福受胙熙事備成權

京本  
作燿

火斯舉御端誠

而大朝會于以篤萬世無疆之祐

二本同  
疑作祐

於是屬車

改轅先驅復路乾熙坤恬協泰齊豫疏祥颺而舒徐

翥游雲而布濩奪騁目而醉夸心扑藪足而踰林羽

千乘萬騎不暘而暄望彷彿以依約至徘徊而蟬聯

霓衣差綵以暗地雲韶紆聲而撲鄺車轍馬跡無取

獨謠白雲之穆滿駉龍駕鳳尙陋按行蓬萊之列仙

上乃御應門弛金科天德貺

京本作德天貺

百福荷鏗萬石

考雲巖奏隆安協猗那皇心懌賜顏色揭雞竿繫囚  
釋堯言布漸動植翔仁風滂睿澤細繹祀典攬蒐潛  
德興滅繼絕繩逋已責徧存問于高年秩牛酒與束  
帛於是歡呼之聲沸涓鍠洋億庶千官環瞻赭黃慰  
若大旱之望雲霓榮若湛露之晞朝陽快若庶鳥之  
宗鵬鷺竦若眾山之景嵩常也今夫施洪則報斯腆  
德茂者禮逾文其事則丘上帝而廟祖考其教則尊  
尊所以爲義親親所以爲仁然而博碩肥膾亦或吐  
諸則貴德不貴物齋戒沐浴有取乎爾則在誠不在



人豐茂省則大養不足以大旅牛慙禴則東鄰不如西鄰此固元符所以材兆物瑩吾民時斟酌攀精真陋前代而講嚴禋也頃歲宗祀明堂格于蒼昊哀對神考既往之聖孝也間者爰兆北郊媼神是報以須敬造方來之順道也今又睹夫端誠之岿岿搶空跋翳方地蹴而天到擁和纏休實神明之所相勞非曠古盛德效邪茲亦贏國削君冗儀細藻菴不可得而匹紹也且夫留滯周南馬談則沒有餘恚當君而譽堯舜亦蔣生之所深恥正得春而不芻信寔豔頑茲而已矣况若小臣親陪祠事苟蟄吮而錮毫持此將

復誰

京本作復將

諉不其鄙歟不其鄙歟敢拜手稽首而

爲之頌曰

瀕洞蒼莽辟元精兮陽司陰

京本作闕

無臭聲兮契彼

自然壇圜成兮百聖差軌款拳擊兮宋更七世逸飛

英兮紛綸煥爛賁朱垆兮瓊

疑作瓊

開金闕踴端誠兮

蹂漢轅唐奄上征兮帝謔肅將臻百靈兮倬彼慶霄

薦清明兮於焉降格若見情兮自時厥後福岡陵兮

若之風雨安日星兮臣夷妾狄寢五兵兮疇蟠壘榮

稼坻京兮顯允天子我民甯兮於萬斯年揭鴻名兮

德至者色澤洽賦

德輝發形顏色斯洽

德既能至形斯有歸故茲色澤之治卒由充實之輝  
根百善之大全初忘物我暢四支之積美罔汨脂韋  
竊原樂莫大於誠人之生也直厥有備善是爲至德  
苟本諸中局者未始虧費則見之外貌者何煩藻飾  
立其大者性命默爾以皆安人焉慶哉色澤油然而  
可識外秉四重中清五綦其中周旋而盛亦已至其  
蓄剛健而新從可知純德發若粹和在斯朝廷之上  
閭閻而侃侃閨門之內愉愉而怡怡志意致修居有  
潤身之積英華外發形爲晬面之滋接物非特旣其  
文成已爲能用其極如霧豹焉澤彩於幽眇如山玉

焉揚輝於伏匿杜人僞之象恭發天真之踵息默然  
而喻始符通理之黃中卽之也溫卒異辭仁之令色  
誠以肴播祭而歸者驩泰可賤取夏畦之病者詔容  
孔艱又孰若藻德小言容之足美身卑口耳之間窮  
而術泌則神王而氣逸達而朱金則心舒而體閑陋  
骯髒之元叔體柔嘉於仲山觀我朶頤微義易捨舉  
之躁赫如渥赭得衛詩錫爵之顏有動之而斯遠暴  
之明無就之而不見畏之忽趨行奚事於舜禹肝膽  
靡憂於楚越何假地文之示自得天光之發所以養  
氣而無是儼嘉孟氏之醕醕樂內而何其靡偉顏生

之勃勃向若蒿目自累火馳弗甯窘勞倦不枯之貌  
圖睢盱承豫之形槁項黃馘者既中已無主曼膚駢  
肩者又愚而不靈遂使蔽蔽而非所知徒慙表襮謂  
謂而相取下舉昧沉冥夫豈知彪外之君子不誣踐  
形之聖人可法蓋泚頹而達面目者未免愧積則養  
指而失肩背者良由智乏故曰德至同於初色澤何  
從而不洽

仁人之言其利博賦

仁者之語  
其利誠博

君欲圖治臣當志仁至矣斯言之告博哉爲利之均  
始陳溫厚之辭徐裨庶政終致休明之澤廣被烝民

夫惟四海之廣無窮一人之臨至寡謂爲之法制雖  
係於君上然物疑之寬恕實藉乎仁者優游亮直來  
篤論於上聰普博淵深洽湛恩於中夏誠以惻隱之  
德素備憐恤之心內持一啟沃盡蓼蕭之澤一贊襄  
皆行葦之慈禍貽無俟於後悔罪苦靡容於橫罹凡  
有說也民皆利之觀過斯知方自立談之頃成功則  
一果周時措之宜膏澤於是下乎民匹夫無不獲其  
所方明己任之莫重豈止悔亡而有序淵若達德藹  
如法語推陳賤踊嘉晏子之告齊別白蹊田美叔時  
之悞楚豈無厚貌終身戚施豈無邪說觸塗詭隨蓋

愛己甚篤則愛物亦至而處情彌厚則處人豈欺是必取布帛以兼暖恥風波之數危慮既及此言斯善其大人格君之非初不勞於自反惠心盡物之願曾莫見於容私故夫物則能供其求以民則皆受其賜濟人何補於陋術移粟何嗤於末利又孰若天回上聽之默識仆起積年之弊事已殊咸口徒深轉末之糜無取屯膏終愧未光之施厥後俗既持薄說非用情鄙矣喬夫之便捷紛然戰國之縱橫膏唇拭舌而何有理奪剝膚椎髓而適資患生煩或勝簡僞斯奪誠利口覆乎邦家悲聞班固傷人甚於矛戟歎起荀

卿異哉守中無待於多言寡信或生於輕諾蓋世濟其美者由反君於道民受其弊者亦達君之惡故知仁人之言其爲利也博



龍雲先生文集卷一

龍雲先生文集卷二

安成劉弁偉明

宏詞

太史箴

并序

慶霄之清明星日之輝融寸眸甫運而全體斯得則  
臺輿牧圉預有其察及夫手揮堪輿神交浩茫形游  
域中而效在前堵雖有智巧將嘗試而不得也於是  
器數出焉日有闔薈月有仄匿星有圓角氣有監彌  
使知有器取夫三百六十五度四分度之一者寓焉  
使知有數器數具故雖處葦室之幽間

疑作

而視周

於崇榭之高明臨風雨晦明之宵分而察加於白日  
之正中然則歷世之相與攸賴不曰中規之渾儀乎  
昔我神皇一作考之在宥也命以司天監爲太史局而

遷之其後築臺別置渾儀象激金水其下機擎輪吞  
排晦幹明至與造化分疾徐低昂上稽洛下闕圓儀  
旁採張平子靈憲若乃賈逵黃道金常游儀與夫區  
區令瓚之屬方之憲如也然天體與人每遠至其情  
則與人莫近焉其於人君顧有所謂疊然畏愛之者  
愛之欲其登假至於道故發祥隕祉有不待頃而契  
畏之使知兢兢凜凜於有天下而如有睨乎其左右

者則夫流字忒蝕侵射暈珥時亦不免而已矣取以告諸上焉真太史事也噤不恪職是誰之過歟竊惟春秋日食星隕且字皆所謹書以戒後世之爲人君者而漢儒之陋必待變異發見君親策於廷然後告則已無及矣敢附虞人牧臣之末庶幾視太寶丹屢爲無愧而塵露之補誠有在於是者謹拜手稽首而獻箴曰

茫茫古初孰測孰窺人不自智器將安施爰有作者揭爲渾儀以智分人揣器而知兩曜合璧萬芒旋蟻四七是經錯若碁時誰其尸之小臣太史舒魄曦輝

俯事仰參德隱曷星初不廢占天子命表敢窺而恬  
焯彼軒象內治旣飭三能協明夔進舉陟太一萃覲  
算開南極勿謂軌道而靡忒蝕勿謂助順弗見它謫  
暨鋪宵節室靡窳釜雨渥雲油長我稷黍歲雖守心  
當序先具偏袞綬胡化爲神綏一兵不試稚舞耄嬉  
芒匿角伏當謹我師馴至醕醜民則不犯覆視貫索  
作我刑鑿魚罩駒維英收俊攬揆之少微爲得賢驗  
從古盛王靡不抑畏朽溥薄兢常出于未損滋避正  
非德之貴福莫盛於保戒莫進乎風史臣司天敢告  
執綏

代宰相以下謝賜新修都城記表

臣某言

云云

鐵甕崇墉更邇臣之筆助龜趺妙勒覃

上聖之龍光祗服有初默循知幸臣某

中謝

竊以聖

人畫坎而設險以守則甯君子因萃而除戎不虞是

戒運際烈考策收故臣拓上世之金湯就積年之畚

築屹臨綺甸轟起雲陣控函夏之襟喉憲紫垣之象

緯固侔繞雷順劇筵俄下陋雍強遠卑墨守雖翼然

京邑於此乎卽安而成若靈臺不可以弗紀是賁翰

墨以揭日星恭惟皇帝陛下莫麗重光宅中國大政

事默修於閒暇道德馴致於安強託不朽於豐碑喻

難名於黎獻露零沾涓粲墨本以爭濡漢倬昭回節  
鄙居而增賁而臣考覽前代揣量極功誥洛宅則止  
取丁甯賦漢都則曾微款訖岐鼓不聞於遠下嶧山  
何補於示夸非如盛朝式在先業臣敢不體防微杜  
漸之意稽經久持遠之功於耀里閭闕藏巾衍辭無  
所愧皆寫諸瓊瑤之餘家有其傳非副在京師之比  
臣無任 云云

紹聖元會頌 并序

臣伏觀唐虞盛隆五服迭朝更夏商周斯制加密禹  
會塗山玉帛萬國至於商湯爰有景亳豐宮岐陽成

康是因三朝受圖漢人賦之區區朝儀未造有唐亦或不廢况膺正統席歸運未有若我宋之盛而陛下之躋闕休緝墜典也邪若乃出于品具萬方計億事材兆物此而不綴非翰墨者罪歟小臣被學最舊於頌爲宜爲頌曰皇帝嗣位十有二載天庥地涵與物開泰曰臣曰妾罔有內外章甫短後秀顯鬢昏陶粹飲和萬室一態朝躋峻良獄洗鉗鈇鏘文黃輝擾籟嬉灑皇帝日嘻當飭壘壤奉先紀元庶靡恫悔有司跼言月征日邁往雖郊見繼又禰配協休登平民物和會惟是班朝亦禮之大懿典楮綱不可弗再請以



孟陬百執前戒帝曰俞哉往踐毋懈于時三朝錯事  
展采初陽載瞰晨陰剝解梢魃扶魃飛廉肅瞻旄頭  
陞楯韎韜金介萬官翔洋至止藹藹鷄粉鷺縷屏息  
收噫冠纒聯聯璀璨鞞佩五路中陳駟虬沛艾芝蓋  
葩華煜燦絳縹如星拱極如水委海如天斯臨如日  
斯挂眾樂備舉縹以清籟乾安正安迭用並採虞業  
騰拏祝哀敵殺么麼刊落兇離儻休奄臻八紘效琛  
走貝地官宗伯履貢斯在四夷君長立列葦葦濮鉛  
鬼更遑差羗輩養心晞陽左言椎髻舌人象胥委體  
司話尉臣稽首赫我昭代農敏于疇吏康于綽卧鼓

韞弓不怵邊薨萬宇更始擁相駢賚天子萬年福祿

攸介

元作屈一作介

尉臣稽首禮則不怵玉色粹溫

旁諷下逮孰爲蠱螟孰致劬勩財力孰贏仕課孰最

孰有國急孰斯民害孰俊未蒐孰冗未汰孰懲孰革

孰勞孰徠百辟愉愉並受誥誠天子萬年衍衍樂豈

尉臣稽首竣事而退於皇緝熙哀時之對零我渥恩

鴻濛汪濊聖敬日躋取乾用夬天子萬年萬世永賴

誠諭士大夫敦尙名節

朕惟先王所與圖治之人修潔雅馴殖德甚固初若  
與世無營而及升諸朝與寄之民上則不懲而夸者

化肅不督而陋者化通浮饒不待鎮而厚濁墨不待  
激而清其久也臨大節而不可奪居盛名而不爲難  
非盛世之效歟朕甚慕之今則不然士大夫或冒沒  
輕儇阻深不情驚勢者以詭祿爲壯圖喜高者以養  
望爲得策責之事而身偷激之言而氣索甚者掉之  
以得喪慄之以死生則低首沮奪惘然自失名節若  
此朕何望焉豈帥之者未至歟意者玩日愒歲怵怵  
於末流所謂風聲氣俗者頽靡使之然歟夫中人之  
性惟勉乃至僥倖之習不可滋長好是正直者禍必  
介罷弗任事者不待頃而廢古之道也其布告士大

夫使知朕意

龍雲先生文集卷二

龍雲先生文集卷三

安成劉弁偉明

古詩一

贈賈仲武

賈侯器宇何軒昂  
下視齷齪真糝糠  
倉分八字髭根黃  
自許忠膽鐵石剛  
彫弓一挽一石強  
錦臂錯出虬青蒼  
匣劍排射星斗光  
壯心飛過邴連傍  
架鷹朝按血染裳  
鐵驄騎出轡鬪裝  
健兒前呵槌列行  
捷矢齊指雲中鶴  
豈惟武力稱擅場  
亦有文價騰焜煌  
新詩字字古錦囊  
清論灑落飛天潢  
險韻千百敢獨當  
管

鋒落紙鏗琳琅古文探討屋壁藏史傳山岳遺毫芒  
酒酣往往歌慨慷連卷大白鯨吞航自云曠昔富文  
章家在冀北邊一方天書屢膺貢州鄉雲衢卜日橫  
騫翔中間落泊志不償武科拉取如截肪况有豪氣  
十丈長蟠螿僅類絆驢驪苦恨天驕久顏頰撫臂便  
覺大袂攘坐糜歲月耗困倉口厭醅釀飽肉梁吾非  
斯人可相望要且報國真不忘我來自東南春陽遡  
逅紺宇同一觴幅巾輕蓑追徜徉促膝調笑初無妨  
自知投分出泛常豁如餒腹得糗粳短長不復置形  
相落去聯睨決壅防稻生轉覺嗜鍛忙高陽還因酒

發狂漫與戲規，祗攪腸。哪嘈不減笛，弄羌截竹，岳頂  
掀滄浪，撥雲春茗，誇頭湯爽。齒旋復行，蔗漿黃金大  
顆，披橋穰，插首往往，羅幽芳。頃茲行樂，殊未央，更辱  
邀我臨山岡。大壺載酒，冽鼻香果，飢梨栗，庖麇麇，韓  
劉黃，胡狄與張。一一蕭灑，雜珮珩，高談終日，佛老莊  
妙理，密契矢插，房絕倒，頭足爭踰，踉罷去，追惜成恨。  
恨誰謂夫君氣，特揚投以大句，尤加詳啟，函愜興劇。  
爬瘍忽疑寫睇，臨望羊高躋，欲斧李杜，吭麟鳳，自是  
品物祥，邀予屬和，馳練細直，取夷險，分鷲良九牛，犒  
師始落銜，正喜先獲大鸞，嘗洪河下湧，淼沛滂，囚屯



泉鬼納大荒脫走束縛投桁楊蒲郎瞰臨獲與滅滿  
注羿矢連九賜沉魂夜泣青女霜此來繼辱厚意將  
殆欲引轍觀怒螭狗尾續貂彌足傷凋胡未易加鞭  
楚搏空方見一鴛颺短翮便可槍榆枋咄嗟豈得不  
知量區區瑣碎久嗜菖食魚誰敢期大魴尙欲勉強  
牽牛箱無鹽弄姿映康莊難工秬益羞姬姜聊將瓦  
礫酬瓊璜終愧後乘非騰驥

元豐辛酉七月九夜大風四十韻

海傍七月無好天頑雲夜半爭糾纏雷公轟車電操  
幟如以墨汁當空滴門闌刺眼不見地逼塞四野可

築拳須臾霾風鼠風起便覺怒竅呬喧闐茫茫平地  
駕輓轆礪石雜下麗謙顛訓狐投隅狗走竇拔木僵  
仆腫不旋銜轟時聞擲飄瓦洶沸錯以池羹煎藩垣  
卷去甚撤幙屋壁如受衆挺挺憂空飛礫正激射况  
復急雨篩涌泉初疑昆陽遁猛獸又訝伏弩攢麗涓  
黔頭豹禪健肘髀剖拆囊袋椎鈐鍵天吳助強馬啣  
舞颺颺嗥嘯尸陰權呼聲過於赴趙日烈勢更甚焚  
崑前酣奔劇驟晝未已陣馬杳奏摩雙韃蚩尤濺師  
灑腥血驅駕山岳揮秦鞭海濤撞春萬華震岌業直  
恐三山鴛林椒宿烏亂投墜脅息豈間烏與鳶蝦蟆

何知妄嗜噴似爲得意驚翻翮流瑩迸草戠光耀嗽  
蜎縮穴愁踈踈往往往走湍瀨卧內直可浮長鱗  
伊余竟夕不成寐縱有短炬誰復然屋如漏釜直下  
注坐取滲漉攢兩肩羸童叩鼻卧東壁噤不譁駭如  
東瓊黎明下堂踏新淖祗覺撫髀成憮然平時里閭  
悉傾侈饑民塞竇突不煙田苗畦甲披殆盡草木豈  
復根株連蒂鍾墮簷相烏折莖豕逸澤如遭敗我聞  
大塊初噫氣蓄泄蓋亦有節宣助天撓物著自易標  
爲玉燭存禮篇條無鳴聲瑞盛世反禾宛在隆周年  
厥惟反此是爲戾標落下土災所緣堯羅長風鬱滋

甚糜以大繳尸諸屬飛蟲蔽空廩君憊一昔蠲起操  
戈鏃往時大旱幾赤地韓子訟藁于今傳詩人或以  
况威虐歌沛自是所見偏爾來暴旱亦時有孰與掀  
屋揚楣枿小家破蕩大家耗飲泣茹恨肩相駢胡爲  
斯民罹此患孰任咎責當尤愆我將玃天吐憤懣坐  
使百怪成拘攣是非曲直當有辨略舉大較歸吾編  
飛廉譴誅豐隆斥庶幾復使斯民痊

同朱彥周遊元陽洞兼示文吳二羽人

窮西三湘鄰奔迫萬岑會盤拏崩騰根疑此先草昧  
不周遷大荒勢落燭龍外遠徵混沌鑿晚怵大塊噫

平疏一注玉寬削四隅黛前崖炭初豪傍竇戢如塊

暗蹊青鮎卧

一作滑

側足得無殆霜蕤擁凝液衣綬

京本

布

倚空蓋危呀傲天頑九地一瘡潰鬱然齒舉姿似

與石廊配間聞赫幽光吹作雷雨解石鼓形似餘擊

考亦砢磴陰陰隆冬戶塞向真瑣碎鴻濛挹氣母茫

昧超物怪不應私開闢

京本作闕

曾是閱成壞黃熊非鱗

化九肋蕃

一作嬉

碩大蹠蹠舞陰機無乃羞主宰

頃有人窮

深見二驚大如畚封

踞質傍若有伺焉者

疑作桂

純白仙物今故在

雲煙更斐疊巧弄非一態貧營下蕭城

京本作瑟

往往到

芋籟片桃仙凡隔愁絕止飛瀨誰爲篝火遊邈叩無

底界世傳元崇隱茲事或虛採驕陽五月竟客子短  
轅邁火鈴擲奔曦酷勢捎林蒼追隨邦閭彥及此洗  
長慨俯窺層冰拆葶收借冷汰孤清凜毛髮生意自  
百倍清絕兩羽人驚我鳳翰鍛掃開數尋天援挽覓  
幽隘嘯傳欣魚貫詣極愁鷁京本退仙者如可作庶  
或喬松賴一云立拊咄嗟早衰身樊籠信誰罪便可  
冥三奔吞漱駐童彩收攝自煎明茲焉跡長晦

儀真呂明父席中觀新曲

有客揚楚舲歸歎汨吾事波神慳東漲吞過限修蟬  
轉頭彫歲陰蓮行變匏繫一逢金鑿人穆我若清吹

挽盪十尺牀淵襟掃苜細盞封拆初黃露液攢沸蟻

老實侑股

一作秋

紫枯螿嚼霜瀆坐有豪爽賓譁譁睨

雲驥屯雲刮癡白有如擁天簪疏櫺炯蕭森北固泐  
遙背半酣大軸出鯨窟咀甘飴當中傾玄圃瑤瑤紛  
百穢物愁殫眇精神妬奪孤閱快魂疏泠泠大叱回  
熟寐况復儀真曲不減銅堤思淩清激吳音皓齒曾  
未愧辛醎皆可口卷舌得真意初如嚴冬過肅物有  
餘喘未似陽春回悅入俚骨醉將壇凜先登樂府仍  
一洗呂侯斯人望胷中弔古氣二十佩青綸三十清  
間侍高纒見騰踏茂渥擅褒賁頃來笑畫臚無補當

身寄卜筮傲園綺秋蠋一官蛻大筆橫利槩興來卽  
摩壘非如騷些徒冗語釀愁悱珍重白玉船虹吞楚  
狂子

送方絢解元赴試南官用桂林一枝荆山片玉

爲韻入首

時方氏季孟三人五名前  
易荆字者避方家諱耳

紛紛束書兒穿穴蠹栖桂及當千人軍往往出下計  
誰如冠軍豪飄揚選鋒銳刺手拔鯨牙灑落見孤詣  
更看抉重關喜色動春袂

人言蜀道難歷井如

一作加

捫參何如棘圍裏對面橫

霜鐔聲價一日中不數雙南金秋風大情生半入瀟



禮襟神有百鍊骨躍馬辭家林

馬家白眉良田來罕儻匹誰諧虞帝音貴在得夔一

顧預康樂後况有阿連出谷留棣萼好影廟側

一作鶴

原密定是金華遊羊邊起高叱

君王十二閑一一登權奇飽之青玉芻絡以黃金羈  
南宮舊冀北雜選追風姿驪驕固神物豈病孫陽嗤  
如聞有桂約暗滿秋風枝

我來莆之陽與子初班荆巖巖太古鏡中有不蝕明  
青緗無留賞理到刃必迎睢盱腐儒後數見胷膺橫  
詩哦逼振綺酒吸摧奔鯨君看老雄變冠距將而鳴

病夫亦何有愧彼小西山  
賴君不佞拔捷捫吾關  
意豐報逾儉叩迫出益慳  
經郛榛萊翦聖海波瀾閑  
茲人不易得坐使幽懷刪

天王坐明堂溫詔飛赤縣  
家家魯儒生羣星會頭弁  
坐愁谷駒空豈直罩魚擅  
子行殊未央去逐淮雲片  
神鋒正吹毛願看長鯨剽

女牀固饒鳳方流亦生玉  
百年海邦莆文雅殆成俗  
之人卷鯨波浩汗寄高躅  
鬚笑泝泝子長年事鞞瘡  
唾手拾壯圖未負春顯綠

古風謝汪都講示惜惜吟

番陽先生萬人敵少來繙書始成癖風前白眼望青  
天笑捉短鬚吟惜惜地祇關鐵掣臨賀天家寶場正  
中劃萬空一作扶坎覓坤苗鑿盡頑陰治清液鍊磨

鏡鑰歸高手養水工夫價連璧別斷圓虛費鈿鈔粉

白黛緣低真色傳君代北青氈毼一泓幾動春消息

無論丞相戒撲滿先許司空熾一作然石楚萍赫赤

浪傳甘秦在糲糊徒薦客由來此秘似未覩瑣瑣搔

爬嗤美炙先生早茂椿松姿道韻仙風方日逼胡麻

青飢飯調饑夜榻抱弓跽七尺粉闌聊當襍被遊齋

攜不斲胡奴力大斲酣酣動蟄雷霜颯澁盡銅壺滴

青螺仙女暮成炊綠竹夫人寒卧壁興來活筆卷天  
潢南國小巫陰褫魄悠悠萬物何親疎新故終緣世  
情隔夏裘秋篲竟誰負寢廟偃溲轉身易昨布東皇  
九十春融冶一番浮綺席莫學長檠換短檠惜惜鷓  
夷兩拋擲

癸酉歲暮壽春道中五首

有城有城半蕪沒側強當年開狡窟青韁白馬成底  
事魏得其狗空凌突清淮不洗饜利魄石馬崔嵬化  
英物據鞍浩歎爲踟躕但有悲風起蓬勃

有鳥有鳥高飛鴻哀鳴嗷嗷隻影東枯聲策策霜後

葉狂態騷騷空際蓬秋毫不礙掛天斗一氣正在胚  
臍中客邪中饑亂心曲短裘垢襪催衰癯

有渡有渡背北城凌排駕淮吹暮聲郵程未央豈病  
涉寄汝一楫推生平古來豪士重感樂車下未乏宵  
衣征出處任天幸無苦有如此水吾其行

有叟有叟皤兩顛杖藜道周傲天年懷

疑作壞

顏發笑

挽行子胡乃憊爲忘舍旃吾儕小人敢不勉孔孟卷  
轍如趨然男兒禿脰乃始已非爾所知徒憮然

有客有客垢髮鬚羹魁掛鞍無宿儲翹心北闕比寒

藿他日南山拋舊廬逆旅丈人

一作夫

真脆意揖我下

牀邀踞舖悠悠高門擊鮮子萍匏殊根勿請渠

建陽縣二首

東甌消沉故王日俗號剽輕如故實挾策不數應門  
兒雅尙儒人鄒魯匹頃來官長稍自安市里頗聞浮  
訢窒陳侯健者吾故人坐致豈康得無術

紗民趁商市日高紅女機杼仍分曹雙橋卧虹上下  
水石脊瘦龍狂鬪半穉登爾場俗豐樂匹馬北客方  
涓沼轉將身掛利名網擲此故歲如騰猱

贈相掌文廖生一首

有引

相掌文廖生自云前十年余舊也

一本云余十年前舊也因追

計登第以來符驗畧如生言

一本云與生見許畧同

今又相遭

於蠟水之上求余詩尤力因攬筆滿生之請云

廖生術天與如鑑掛高墀能以禍福語感動諸奔馳  
至有不旋踵坐獲百萬貲推排鬼氣奪攘斥海岳移  
自云前十年負術驥螺涸閘中出雙掌得子如沙披  
乃今十年後所契了不疑況有遠大語未易論銖銜  
曾聞物外償不若君家詩吾謂廖生曰一詩何補爲  
生云等詩爾我則如渴饑一詩固不惜爲生試言之  
天地有文理俯仰自可推有文在其掌乃晉魯嬰兒  
方其表異態覽者初亦癡生當千年後把握論蒼龜

顧京本生勿輕許角立非生誰

贈廖相手一首 有跋

廖生得掌訣初一作爰自麗眉緇生白云得術於南岳老僧束身事

覬管羞爲不情兒力一作間持禍福語傾動諸奔馳所

至餉自倍如賈操贏奇衡從辨役射側正分隆庫天

緘若初闕鬼覷慳闌披環環太史氏抱珥司渾儀臺

與與侯一作公王初一作自不論何誰寫照阿堵中唯生

鼓頤頤自一作因云前十年挾術驥驟涓伸縮殆萬肘

較量但一作止肥羸最晚得子掌決背逾灼龜九方揖

孤駿神覩歸心師子姑詰奇中曩言甯肆欺今者非



他須子盍償吾詩藁因拂衣還松丸染高相我聞一作

有圓形質至文一作款識從可推懸象麗霄極川岳羅坤

維逸獸別彪炳京本作炳鬱激水生一作吹漣漪上飾右繪

綺高蔓紛棗栢石鼓貴刻畫汾鼎珍陸離鑑靈不漫

理節煥饒豐鞋器徹緣有豐玉捐京本作卑因見疵况當

筋骸束前構了不疑縱理口尙驗一作吻角萬字胷猶

宜一作萬胷表西慈握鉤瑞宣父方蓐識一作符魯姬灑壁亦

公耳刺文徒帝爲妙寄斲輪外如生信天資秋高撼

萬木客竈倦孤炊徑棹直東臂喜動雲林姿贈言愧

非澤聊以當飄齋

生俚之尤者一日持兩盎自副曰是名兵廚冀以當子詩償予其就章毋辭余笑謂曰方事之殷了不復有詩興視盎中物正自天遠亟持歸無多餽人也決起剖盎長跪見酌曰世所謂以軟腕此真是矣其不擇緩急如此不得已爲倒盎詩以畀之且跋其後以見拳拳於一時云

走筆答郭子隆勾稽

春歸幾何時綠樹陰已滿蕭條子雲巷誰借吹壺暖  
常日雙柴扉深扃類休澹雅燕掠翩翩疎蟬弄淒斷  
穎芳聊自娛併食習成懶疑疑棲鸞郎蝸居間三款

兒童憚逢迎應客事謾謝絕高軒榮祗增鼯鼠短  
賴君不吾靳尙復斗筭南薰破笑語慙勸接聞促  
酸然梅雨天煩襟斗滄浣波瀾信苦孔風力到微管  
加有建安作大軸舒憤懣力關神臂弓傳以青玉符  
自宜造英莖豈直駢組纂居然膚寸毫搜剗入稀罕  
諷疾頰渦飛把持手爭盥索然貧窶家連挹茂陵盤  
久矣吾衰頽占數還鄙鄮長年苦中乾更事筋驚緩  
比鴈自不材方木宜登散赫如千尺光旁爍幽隘窅  
處此得無猜神觀迷叮嚀誰如富青箱利器未施積  
匹馬青螺城戢束聊投館愧無青田核相與申燕衍

曾是翻瓦甌撥疎仍淪卵雖非夸雕俎猶喜從既祖  
吾人重解攜茲游未應橫行看赤驥駒萬里修程坦

送李侯朝散還任一首

有引

李侯朝散倅秀之三月沿牒來洪幾一稔矣今已事  
還任好事者率有詩送行僕雖不敏敢不佐之

西山閱今昔章水弄清泚雲陣插天半滕閣中隱起  
青鷺千萬家湖光豁如洗鍾陵一都會信亦非偶爾  
君來無幾何所得已倍蓰笑談送白日慷慨拾遺軌  
成詩殆百篇天籟落凡耳秋標拔孤峰陰膺掉百鬼  
顧我伯儼人晚乃識君子未漫禱生刺先倒蔡公屣

清揚舞眉間秀語眉環藻囊闕錐立見公今無乃是  
翁何追歸歎笑把吳雲指六月江南天頌堯劇含泮  
輕篙下鯢浪畫槳搖羣尾高懷傲匡廬醉眼寬彭蠡  
山長楚甸轉駛席當作挾空紫珠璣粉滿篋銀鈞赫  
曉紙野蕪饒撥英水象尼緡經人生不知他安與樂  
而已行行勿滯淫吳中古來美一官雖翕翼焉往不  
爲仕洞庭五湖間明月清可賦鹽豉誇未下葦蕩貴  
千里由來張翰興今復見松水吳兒洗眼看吾豈倦  
游士九月秋風高緹騎迎攜李

寄李彥瑞端臣

吾生本何爲筆墨代耨

京本  
作耕

耒拂衣辭雲林偶與寸

祿會隨翔俗子後如垢不時贖幾欲臨紫虛標身飛

鳥外時哉不吾與歲晚休憚沛炯炯平生心誰與論

梗槩李侯西南秀胸腹無留礙表表起孤韻剋飄寫

蒼檜筆挫三千英壯甚敵王楸高舉若木枝直撫靈

熬戴前年帝王州晤語早傾蓋欣逢妙年客良愧脫

晚態謂我文字工超起

一作  
忽

到前輩去年清漳濟經

從不辭再高談破三鼓陰贖掉百怪是時方窮冬瑟

縮寂萬籟滕閣掛星斗巖根眇江帶慙非徐孺榻僅

飽吳兒鱸忍爲鴟夷笑恃

一作  
時

有太白在四騶馳頽

年遺跡掃茫昧君今規壯圖吾轅方未改青原心欲  
折合散幾煙靄空懷簡書畏未卜簪裾對醜思謝容  
吟拾月弄雲海

石廊洞

在永新之蓮花村

君不見仙家三十六洞天西南大半盤蒼巖此外元  
陽擅嶄絕况有石廊人喜傳碧蓮參差隅地湧徙倚  
危梯飛蟠螭陰陰洞戶半空開一縷聯凹愁寄踵萬  
鈞崔嵬挂礪石吁可怪一作畏兮若飛動天然湫面尋  
丈間寒掬初慳媪神捧紫崖蒙茸瑤草秀懸泉涓涓  
挹天酒淑靈豈卽乾坤私窟宅宛是神仙舊飛鳥點

影陽光回遊子履深驚殷雷九夏三冬自回幹雨暘  
寒煥爭喧感神物奄有似無謂突兀古廟當巖隈  
鼉笑舞助怪變落日愁絕松風哀瞰臨一方殆天意  
累露之疑此其是仙乎仙乎胡不歸忍使秋燐泣陰  
鬼

同楊方士存弭楫圓潭澹因賦詩卽事

媪神臂陰關一水下辰卯青玉走萬岑收來不容稍  
盪爲無涯津衍衍究深窅誰乎張曉咽吞嚙爭一飽  
復疑刺秦魄環柱怒方劫直前孰長驅橫鶩孰侵鈔  
或來浩無旁或去削京本如剝長年雷車轟盡心轉



蓬掃春容送日月汨沒亂昏曉老蛟非無須一拘攏  
困窮鯁魴雜鯁鯁嬉沫佐陰傲翻彼晉高真羽駕  
道狹直下錮三泉所補決非小今無垂澁憂過者色  
猶愀蒼波耆舊空斷石風烟老琳宮跨峻嶒像設儼  
細縹爾來南北帆坐閱幾飛鳥我作六月游未覺煩  
暑到撫舊感徂遷商功愧論報方寸洗濯心得君此  
同調

龍雲先生文集卷三

龍雲先生文集卷四

安成劉昇偉明

古詩二

次韻和毛正仲胡潛畫鶴歌

青田有仙物脫畧眾凡外駕彼輕舉人逸與五雲會  
一朝羽羣空誰識真意態有客筆氣捎雲莊寫以全  
體翻低昂月棲宛是隻清影露警似許聲圓吭舊傳  
蟬雀傳輕篋末技枉奏眞屏涼非如楚綃削一作秋

水迹未拔陸心先翔叔寶踞瘦骨巢父洗塵戀屋壁  
擅新誇巾勝揜餘玩展疑洞天逼緘恐神物怨因舞

成賦良未真緣相作經那足神萬黃金輕寸毫重劍  
術豈啻移斐旻薛公鶴手高唐世其人已逐東波逝  
儻得胡生肖似歸古人未必令人非

李宰新成假山

夫子絕俗姿趣尙豁雲海花移洛下品池割天潢派  
中間疊差峩石手紛磊磊功侔一簣始正爾臨爽塏  
羅浮窮南勢迎日出巧怪洗昏新罅發秘匿若有待  
騫騰天吳揖聳削虬尾擺當頭七八峯縹緲散青靄  
直下三四溪何年取東匯洞指白鹿迷路認桃源改  
時時攻其煩瀟灑遞天籟得非緣夜半提挈有真宰

俗物卑培塿高標想衡岱我家香爐傍登躡素心在  
一從羈官綴未省識崑崙俯窺攙雲骨逸興幾十倍  
無爲議眞假自可蠲塵浼何日升君堂把酒取一快

遊浮洲寺寒林亭

吳牛喘月齒髮頽晚陰闕雨雜殷雷一番重釀髮人  
暑徑欲濯澗捫崔嵬潭潭招提此亭在鷗鷺慣客無  
驚猜番君故國號瀟灑巨浸沃日西南來別爲瀟茫  
浩汗之沼沚中有晶熒照耀金碧之樓臺錢塘未應  
遶北顧眞悠哉飲牛之津幹星渚一色藍英玉奩貯  
連岡十里卧晴虹近竹遠松如抹堵就追神觀所得

多清風爲我生曾波有生弔暑乃天性獨快疎櫺亦  
吾病無論承露盤未議清涼境安得大地變廣寒相  
與一世振絺屏楚纓頭冠

黃魚鮓寄狄復之因佐以詩

魚有健且修供庖厥名鱸紛紛水象中嗜者貪肥鮮  
額根束短喙鮓皮突鱗肩十月天風高三櫺潦聲乾  
修蛇列長尻獵獵排曉湍魚師頓舫舫柔髻掛釣竿  
小固不足數大或斤盈千丹膚染霜鏹疎鱗脫連錢  
吳儂喜健噉日取充羞盤我食幸有餘鮓法得新傳  
薑芹間紅糝漬以春醅瀾置暖恐後熟羃塵防弗獨

異來發新坵正喜供饑咽瓊麩附骨脆黃臘豐脂團  
麋鶴信非工豈復數蚍蜉臨馬試何事屠虹抵誇設  
福州聖如斗密覆恨不寬勤勤寄我友持以敵瓊玕  
君識茂先比舉鸞知所然此味勝他味勿作等閒看  
石港高侯見遺雛鶴輒成十五韻

我生好鶴乃天性得自高侯非所祈啄插錐芒初穎  
脫頂埋丹穎未依稀親攜竊笑髡籠返細看恐先喬  
烏飛三島夢魂迷曉色九秋舞影怯霜威長哦自異  
晨烏啁瘦骨全勝野雀肥無跡可尋華表舊有程應  
想洞天歸精神瀟灑元非俗飲啄安閒似見幾載以

畫船休缺望浴之野水好生輝漢宮舊拂仙人掌遠  
海今看羽客衣勿爲稻梁生健羨第令鷄鶩許投依  
鳴臯不隔高竊志截脛初忘過分譏夜砌行聞清露  
警午窗終伴醉棊圍右軍鸞謾誇真賞海客鷗空駭  
暗機煙月此生真不負蓬茅他日肯相違片心便擬  
成高謝騎去揚州弄晚暉

送李令如堤上部夫

東風日作催花計減去年來大半春未省春歸向何  
許真成等閒愁殺人我欲揖君空酒樽君刺野航朝  
涉津翩然揮手謝春去我欲留之良苦辛沙堤漫漫

失故處下有清海濤頭奔濤頭奔可奈何江淮由來

水事多田家遺丁纔取具吳歛行勸不煩訶蝸牛小

廬亂雲鋪梓

一作拌

土把草夷陂隄我聞神禹父九土

息壤能蟄千丈波獨坐敗堤去民吏穢笑王尊禦濁

河李侯方精強程督宜有科民事不可緩田疇久滂

沲噉噉老將稚意在卻蛟鼉無爲坐歎息勞事非蹉

跎山膚雜水參強飯時吟哦暮歸泊煩促不厭玉顏

醅他時解看官門北千里長虹卧軟莎

### 憶昨

憶昨年甫壯弄翰白玉京自許稍不凡笑談揖公卿



蟾蜍貯書滴彩筆當按橫束琴推隻彈後出笑商聲  
舉芝得孤秀濯重抽繁榮時時騎箕尾儻擬諸儒生  
斷經謹誰何森羅護千兵白裕照青春綠鬢影華纓  
步兵卒獨駕禰衡有虛名寫懷紫茵閣指日邁西清  
短翮無逸飛顧與俚俗并七年甫一第脫簪纓白丁  
簿書聊牽強短褐戒徂征十月揚瀾浦千里海陵城  
風濤寸心逼節物兩毛驚茂陵饒渴肺臨淄少宦情  
掣肘亦奚補隨翔終少成有如蝓螿蟲蠹米取腹盈  
丹經徒虛語欲仙骨不輕顏年負壯圖白日阻丹誠  
鄧禹解笑人斯言良未平

人日

去年人日螺江邊今年人日在通川故家浩蕩五千  
里客子騷屑心茫然霜蘆盡解故時葉生意斗爾歸  
蘭荃海風如刀冰塞渡欲航野水雪暗天他鄉信美  
非吾土香草悅魂真浪傳南冠故聲祗操楚劉章雅  
志惟歌田五秉如單費廩粟一囊就盡持殮錢顛毛  
冉冉不吾與齒根浮動輕於翾小雀誰言畏死鶴未  
肯屈折同栢棬章貢直西三徑在爾來望眼欲成穿  
科桑洗竹眞吾事孰使齷齪纔充員何時解得無拘  
束歸釣潭頭楓葉編

同李端臣遊薦福寺禪院

相期采眞游，驟得青蓮界。戴公舊樓隱，締構化祇祇。  
古老張祖乘，參兒走巾餅。百年沸魚鼓，杜一作聯

青冥白門三面水，天末蘋風起衣重。寒濕雲苔幽涼  
屐齒南來雙春鋤，乾雪點晴湖。憐渠足閑淡，悅欲與  
之俱。蟹眼課谷汲，分餉雲腴泣。落日轉金繩，林暝歸  
鳥急。束身事幽討，稅駕苦不早。及茲一蹶然，微君孰

顛倒

叙舊贈董承君 并引

弁十年前與董承君承議，摻執淮上。今又相值於故

鄉契與比舊則有加矣聊欲見之於詩遂賦古風云

搖搖不根舟瀾漫隨

京本  
作從

所適朝辭呂梁險暮駭瞿

塘迫長波送日月滌與雲海隔晚從天末歸良愧故

人識夫子吾土傑

一作  
秀

久任詞翰責刺手翻天漿灑

作甲古墨班班出素蘊想見豹姿澤憶昨長淮孺半

面欣相得君時天涯官我亦西風客薰絃破愁顏爽

一作寸京  
本作懷

息洗連璧吳岑刻

一作  
削

玉瘦吟對挹佳色

顏年瞥眼過十見溪草碧鍾陵旅學子官况秋蟬翼

影撇愧西瞻弔影心惻惻魍魎競擲揄甚者得鳴嚇

由來次公狂僅免陳遵謫敢意今者見依然得江國

一作復此

鄉情比重裘暖氣回肘腋南閩與東阡間

驛車馬迹古人重交契遠

一作

有千里憶連牆彼何

人老死不相覲張陳汨勢利光初竟何益青原秀撞

天螺水藍膏擘襟期

京本作君情

方未央更約浮我白

送邢清臣赴左選

泊舟梅林浦解纜墨潭灣層波日日生雙槳那得閒  
麗眉青翰客相與春風還江梅吹欲盡江柳未勝攀  
無以持贈君對君成強顏官况斬新好晚步非間關  
直北清夢多半落夷門山慙慙尺素語毋爲魚鴻慳

送真藏主赴泐潭乾老會中

昔別大仰巖今逢章江濱浮雲限南北歲月一欠伸

上人邗閩秀落髮早辭親滄浪浴日月一作初不點

垢氛問師頃何事學佛苦賓賓納踵不輟屨京本作屬無

乃大勞神自云吾西兒腹寶殊京本作彌不貧是身難再

得所惜劇蠟輪十年躋楚嶠六見匡山春總祐遷秀

晉五人者皆誰疎復誰親兩束身從之遊驪嶺一一

捫如疲得熟歇似笑回孤嘖近聞邑別境寶峰插高

旻中有拔俗老疑馬駒後身滄風了不制癢興如爬

皺鬪綠稍暗地梅雨吹南雲輕於涼風翮笠首攜筇

孫男兒貴決裂勉哉行問津

贈前任瑞竹寶禪師

將有所住持而中已故有是贈

清曠上人四十餘二十爰祝髮與鬢惟柔與梓舊螺

水四維隨典卧起俱

京本作經營百紙不憚渠

陽岐有嫡嗣曰勇

得法殆亦

京本作與

西佛如

京本作俱

昂昂出世建業寺

警一作

如京本

土囊口納眾噓金形子有吼物志

一作師聞初廢寢與

食

卷鉢攝節

一作卷東節鉢

重趺趨玄契妙悟似不偶得未

曾有才斯須

京本作甯它須

生平學解一朝盡貳負臣忽脫

帝拘無端梅柳漏春信成蹊桃李言略無

京本作巧遲拙速歸

雙泯一日如脫貳負拘春風破

頃拋瑞竹依章澣埋

地豔百卉別有桃李言畧無  
照接衽最下徒楮衾營席聊卒歲末俗未覺誰龍豬

蒼岑白澗謝人境南若楚岳旁匡廬斜幅繞脛湊初  
學蟬聯大利知幾區又其甚者控闡闡金碧爛日傾  
國都如師不使正法席笑眾釋子何朱京本作其愚玉虎  
蟄音久不吐京本作發是使一世狡貊虛陋禪趁塊拚孤  
唱何啻雞蹠隄江湖瀘川南子一作安成男子素狂直爲不  
平者有矣夫雖師京本作師雖理自無固必欲得垂手可  
後乎由來世事多反覆使我北望長嗟吁

了頭巖

弋陽之東當古道有石突兀號了頭苔侵薜剝風雨  
蝕骨幹聳削如饑餓不知何冤上訴帝叫闢之勢難



稍留草木焦禿僅比髮獨瞰平臯疑秀發淺深丹頰  
耀晴霞鬢髯瓊梳掠初月行人躊躇眸子眩凝女垂  
手亦何別惜哉僞態苦冒真土俗傳誇疑有神陰崖  
黝黑崩脅腹石眼六七流嵌根君不見望夫嶄嶄亦  
頑石似不徒然肖真魄顛預廟食爾何補登進雞豚  
始乘隙安得擲置八荒外化作膏腴豐稼穡

車盤嶺

去年踏雪車盤去今年執熱車盤來去年險澁自其  
分車盤於我何有哉道傍飛磔如積糝幽蔓緣崖不  
盈攬懸知到此客脛酸愁絕雲舒與煙慘半山棲

擎華蘇旋覺陰機萬鈞壯鐘梵時聞一兩聲妙界還  
疑落天上短褐頭陀揖我言此途詰曲知何年名情  
利態過萬計未聞厭者仍紛然造物驅人不留驛車  
盤有盡人無盡勸君莫歌行路難令人未老華雙鬢

過紫溪驛讀黃安中丞留題

其卒章云如今  
只見經游處不

見慈顏  
淚滿衣

金鑿天仙才滲漉膚寸管由來風飄將要出江謝遠  
一生忠孝心倫匹世所罕曩聞奉安輿駕言得茲館  
喜先行轉動榮入綵衣暖他年逝波痛故國松楸眼  
春暉草心盡日力烏哺短銀鈞壁間字刺落歸粉板

捉衿來孰復如渴醵，  
碎瑣顧我么麼姿。  
辱公披沙揀波，  
瀾沂訟闕藻火止。  
規轡公今青雲上，  
功業壯圖滿。此詩落人間鼎味，  
纔一機。

宿孫彥僚舍居

先生綠髮隱爲己，  
得能

京本作一何

多瘠田止三稜，  
藟蔗

紛陽坡自言世情确，  
冰火相憂磨刺身。  
一不售，  
暫去肩隨和爾來，  
人累輕但起歸歎。  
歌青冥遙鴻賓紛紛，  
空雀羅我來卧。  
京本作臨松槽京本作竹斗酒客顏醅，  
揮手勢利徒寄之相諧，  
呵黎明又南首，  
其如梁鴻何。

宿法藏禪院二首

斜河左界懸朱提冷燼掠天螢  
糝飛高梧泣液涼參差前村後村  
烏夜啼雕甍綉拱絕坤維知自在  
世張禪扉有耽釋子麗兩眉清梵  
一聲捐翠微亂我心曲天之涯寂  
慙故感迎新悲歸歟誰是真忘機  
獨鹿水深愁濁泥

白汗泣珠霍如洗枯椀聲噤松風  
死班如匹馬客戾止化人之宮  
蘊天起錯寞形骸寬一寄天涯  
特地悲身世齟齬由來真博齒  
白頭區區忘男子跋狼之胡  
窺狼尾世路傷哉澁如砥

清思

羲和日車脫其輻白雨洗天泊煩促綠蒲紫荇媚回  
塘搖搖瘦青環櫺蠹景長臺榭翳復明百尺虹腰粘  
淨涿神觀翛然物外歸一簪斑籜動涼颺天上廣寒  
之宮不足羨人間漂清百斛眞吾師

憶黃天倪

游絲罥空生別愁我車欲駕羌無軌驚風吹花濺紅  
雨白日西注僚丸投青春九十行過半天腳空隨江  
水流思君度日倚高閣時把長懷寄寥廓古人不願  
身後名但願卽時一杯樂安得此身生羽翰高竊便  
似追飛鶴

村南

村南行吟踏新場馬乘款段壺懸漿稼如濃雲稔含  
黃柿葉一作栗亞枝收趁霜臘團鷄髀盤餽香簫鼓下  
神巫正狂呼兒往問當壚娘清美何如願建康

安成道中作六首

故家楚尾隣三湘粗有晴地麻與桑利機未判身輕  
嘗生涯寄將一葉上歸釣蘋尾秋滄浪

翠篠娟娟棲暗芳半隱半見誰門墻分曹戲兒疑鴈  
行今我垂垂老境逼竹馬鳩車憐汝狂

波面擲鱗銀作刀波裏陟釐紛暗跳清秋駛編吳兒

操會待長風十萬里躍入雲海翻驚濤

愚智紛紛同一朽翦斷愁根莫如酒誰是瓢齋不離  
手但令秋杵登我場不應他日羞牛後

新里當南義櫺北一水中飛抹山帛吳歛楚俚愁狂  
客十年仍作嚙嗟遊羞拾靈著問通塞

酸然軟雨吹空濛忽掛萬丈橫霄虹陰晴回互倏翕  
中由來天意不可測惜哉庶物終鞠窮

夜歎

丹鳥白鳥

一作丹鳥白鳥

爭吞吐還雲去雲無定度不無夏

簞工熨體况有秋蠶競扶戶一嘅三歎詎如許客思

紛紛野煙縷宵明景晏掛斜河叢萱苒蒨團清露有  
美一人在西方白玉珮環珠兩瑱明眸皓齒豔朝陽  
企予望汝涕泗滂安得捉汝羅衣裳

送曾該

紛紛夸毗子什伯羅秦缶擊考非無聲顧出俗物後  
曾侯西昌來頽拔殆天就等閒發秀語颯灑如振垢  
渠黃京本作久爲世一作時生駿骨謝前朽整頓萬里足往  
矣擅天廡

畏日三首

畏日杲杲天東隅盤飧逆旅進山膚岑峯遠岫不知



數磊落近松如有須旅人瑣瑣信物役逝者滔滔皆  
利徒目送長雲藉平隰赤驥一本作驥子正愁青玉芻

畏日赫赫天南隅漫漫白道盤鬱紆過蛇搖毒宿莽  
死陰崖發精懸泉枯沉迷未省招楚些激越可是歌

吳趨目送長雲指萋蒨轍鮒愁絕一作泥西江濡

畏日慘慘二字別本作慘慘天西隅半規銜山我僕痛招提

訪尋數里近牛羊斷續前村孤揚塵動滿垢膩爪好

風不借清涼驅目送長雲下碣磯鷺鷥疑作鷺鷥愁見選賦

對陂陰鬼

杉溪驛驛有鮑朱二婦題識

竹巖杉溪道路長道邊古驛開蒼茫分流溪水薄枉  
渚挨石人家環上方王程星火懼將恐霜冬草樹芸  
其黃去來今昔幾男子姓字喧傳兩女郎

送席延昌奉議

章水如有情爲君生層波匡南萬岑玉遙知清興多  
四年一官去擲此歲月梭恨無青田核遣君韶顏醜  
贈法雲守光上人

守疑作寺

日邊開神臯古剎面青嶂寂寥千年後凜凜發孤壯  
上人簷蔔英絕軻超性相獨鶴疑瘦姿層冰爛清尙  
雲游始丁年自副乃孟杖鞭羊去智害盡墜契郢匠

噉呀般若音浩汗卷溼漲衝尊灑法味如取赤子餉  
九夏天無雲暑風濁於釀汨吾眇西征揮汗迷背項  
耿耿清涼境一榻炭相向屢滿甯嫌猜目擊自張王  
禪場推選鋒宛是暗鳴將洗我苦空語盡決濛霖益  
兜羅辭銛棘何有挂諸妄露地非端倪灑灑白牛放  
惜哉功名誤未爾寄物當他日虎溪傍還期杖藜訪

黃泚

不出東城隅三月今者忽作黃泚遊渾渾大江刮海  
窟黃泚一水學潮頭潮去潮來朝復暮蕭索千里空  
滄洲沙呷土唧亂人眼分曹豈啻魚鰕稠蠹粉飄霜

紫折木着水凍雲銀篋箬老漁釣蠶踏新澱穠婦績  
草當空屋總轡愁聞路人語新年已非故年熟故年  
楚麥破分收新年未省飽饘粥保丁催科不貸人行  
且稅桑賣黃犢向秋但無惡風濤舍北相將拾種桂

北禪水閣走筆

西風涼客衣弭檝滄江潯晚一作曉吾事瀟灑聊復此

登臨雲容不礙秋清樾有餘陰煩心洗東波寸目明  
遙岑樊籠脫鳥窠搖落弔蛩吟莽墟閱今昔長慨撫  
孤罇故楚冠劍一作蓋盡物情幾浮沉懷哉歲將月無  
爲空滯淫持語朱陵翁須矣吾抽簪

龍雲先生文集卷四